

**Inuit 18-it qaangerlugit ukioqalereersimasut piginnaangorsaaqqiinernut piareersimangitsut imaluunniit piginnaangorsaaqqiinermit aallartitsinissamut ikiortariaqartut, napparsimareernerup kingorna nukittorsarneqarsinnaanerinit atatillugu periarfissat pillugit upernaakkut 2013-imi ataatsimiinnermi nalunaarummik agguaanneqartussamik suliaqaqqullugit, Naalakkersuisut peqquneqarnissaannik Inatsisartut aalajangiiffigisassaattut siunnersuut. Nalunaarut kingusinnerusukkut nuna tamakkerlugit iliuusissamik pilersaarusiortoqarnissaanut tunngavissiissaaq.**  
*(Saqqummiisoq: Inatsisartunut ilaasortaq Olga P. Berthelsen, Inuit Ataqtigiit)*

**pillugu**

**Ilaqtariinnermut Peqqissutsimullu Ataatsimiititaliap**

**ISUMALIUTISSIISUTAA**

**Siunnersuutip aappassaaneerneqarnerani saqqummiunneqartoq**

Ilaqtariinnermut Peqqissutsimullu Ataatsimiititaliaq suliarinninnermini kingullermik ukuninnga inuttaqarpoq:

Inatsisartunut ilaasortaq Olga P. Berthelsen, Inuit Ataqtigiit, siulittaasoq  
Inatsisartunut ilaasortaq Debora Kleist, Inuit Ataqtigiit, siulittaasup tullia  
Inatsisartunut ilaasortaq Isak Hammond, Inuit Ataqtigiit  
Inatsisartunut ilaasortaq Justus Hansen, Demokraatit  
Inatsisartunut ilaasortaq Knud Kristiansen, Atassut  
Inatsisartunut ilaasortaq Ruth Heilmann, Siumut  
Inatsisartunut ilaasortaq Malik Berthelsen, Siumut

UKA 2012-mi ulloq 25. oktober siullermeerinerup kingorna siunnersuut Ilaqtariinnermut Peqqissutsimullu Ataatsimiititaliamit sukumiinerusumik suliarineqartussanngorlugu innersuunneqarpoq.

**Siunnersuutip imarisaa siunertaalu**

Siunnersuuteqartup UPA 2013-imut nalunaarummik suliaqartoqarnissaata Inatsisartunit taparserneqarnissaa siunnersuuteqarnermigut kissaatigaa. Inersimasut piginnaangorsaaqqiinernut piareersimangitsut imaluunniit piginnaangorsaaqqiinermit aallartitsinissamut ikiortariaqartut, napparsimareernerup kingorna

nukittorsarneqarsinnaanerinit atatillugu periarfissat nalunaarummi qulaajaavigineqassapput. Nalunaarut suliaasaqarfimmi kingornatigut nuna tamakkerlugu iliuusissamik pilersaarusiortoqarnissaanut tunngavissiissaaq.

### **Siunnersuutip Inatsisartuni siullermeerneqarnera**

Siunnersuutip siullermeerneqarnerani Naalakkersuisut akissuteqaamminni allannguutissatut siunnersuummik imaattumik saqqummiussaqarput:

**Inuit 18-it qaangerlugit ukioqalereersimasut piginnaangorsaaqqiinerlut piareersimangitsut imaluunniit piginnaangorsaaqqiinerlut aallartitsinissamut ikiortariaqartut, napparsimareernerup kingorna nukittorsarneqarsinnaanerinit atatillugu periarfissat pillugit ukiakkut 2013-imi ataatsimiinnermi nalunaarummik agguanneqartussamik suliaqaqqullugit, Naalakkersuisut peqquneqarnissaannik Inatsisartut aalajangiiffigisassaattut siunnersuut. Nalunaarut kingusinnerusukkut nuna tamakkerlugu iliuusissamik pilersaarusiortoqarnissaanut tunngavissiissaaq.**

Allannguutissatut siunnersuutip siullertut siunnersuutaasumit allanerussutaa ataaseq tassaavoq nalunaarutip UPA 2013-imut pinnani kisiannili UKA 2013-imut suliarineqarnissaata siunnersuutigineqarnera. Tunniussivissatut piffissaliunneqartoq eqqarsaatigissanngikkaanni, siunnersuut ataatsimut isigalugu Naalakkersuisunit taparserneqarpoq.

Inuit Ataqtigii, Demokraatit aamma Atassutip siunnersuutip siunertaa taparserpaat kiisalu Naalakkersuisut allannguutissatut siunnersuutaat akuersaarsinnaallugu, kisiannili siunnersuut aamma allannguutissatut siunnersuut Siumumit taparserneqanngillat. Pissutsit qulaajaavigineqarnerisa aallartinneqareernerat kiisalu piginnaangorsaaqqittussatut inissisimanermi najoqqutassanik peqareernerat Siumup itigartitsinermini tunngavilersuutigai.

Tamanna tunuliaqutaralugu siunnersuut Ilaqutariinnermut Peqqissutsimullu ataatsimiititaliami suliareqqitassatut innersuunneqarpoq.

### **Ataatsimiititaliap siunnersuummik suliaqarnera**

Innuttaasut piginnaangorsaaqqinnissaminnut sinaakktissanik pitsaanerpaanik tunineqarnissaat ataatsimiititaliap tamakkiisumik kissaatigaa. Piginnaangorsaaqqinnermi qaffasissumi suliat akimorlugit ataqtigiissaarinissaaq, suleqatigiinnissaaq kiisalu maleruagassat malittarisassallu assigiiarnissaat pisariaqarpoq, taamaalillutik innuttaasut sullinneqartut pisinnaassutsimik namminerlu piginnaasamik pigileqqinnissaannut nukittorsaavigineqarniassammata, pineqartullu sapinngisamik imminnut isumagisinnaaniassammata, imminnut ikiorsinnaallutik kiisalu suliffeqarfimmut (uteqqissinnaallutik) ilannguteratarsinnaallutik.

Sungiusaaqqiinerlutik sullissivimmik pilersitsisoqarnissaaq ataatsimiititaliap qilanaaraa, tassani sungiusaaqqiinnermut atatillugu sinaakktissat piginnaasallu pilersinneqarsinnaammata.

Napparsimareernerup kingorna nukittorsaanissamik pisariaqartitsinerup ataatsimut isigalugu qanoq annertutiginerata qulaajaavigineqarnissaanut pilersaarusoqqinnerit ataatsimiititaliap akuersaarsinnaavai.

### **Siunnersuutip aningaasatigut kingunissai**

Nassuiaammik suliaqarnissamut atatillugu aningaasartuutissat Naalakkersuisut ataanni suliaqarfinni pisumut attuumassutilinni suliniutinik pingaarnersiuinikkut aaneqarsinnaasutut isigineqarput.

### **Ataatsimiititaliap inassutai**

Ataatsimiititaliami amerlanerussutillit tassaasut Inuit Ataqatigiit, Demokraatit aamma Atassutip inuit napparsimareernerup kingorna nukittorsarneqarnissamut naleqqutinngitsut sapinngisamik amerlanerpaat piginnaangorsaqqinneqartarnissaasa qulakkeerneqarnissaa eqqarsaatigalugu siunnersuut naleqquttutut nalilerpaat. Amerlanerussutillit, siunnersuuteqartup kissaataa assigalugu nassuiaammik pisariaqartitsisoqartoq isumaqarput. Suliap ingerlaqqinnerani annertunerusumik ataqatigiissaarisooqarnissaa, taamaattumillu nassuiaaatip UKA 2013-imi saqqummiunneqarnissaa amerlanerussuteqartut paasisinnaavaat.

Ataatsimiititaliami amerlanerussutillit qulaani taaneqartut tamanna tunuliaqutaralugu Naalakkersuisunit allannguutissatut siunnersuutip Inatsisartunit akuersissutigineqarnissaa inassutigaat.

Ataatsimiititaliami amerlanerussutillit aallaqqaammut siunnersuutaasup itigartitsissutigineqarnissaa inassutigaat.

Ataatsimiititaliami ikinnerussutillit tassaasut Siumut, siunnersuut pillugu ima oqaaseqassapput:

Suliaqarfimmi siunertalimmik sulisoqalereersoq Siumut isumaqarpoq, taamaattumillu isumalluutinik annertuunik atuiffiusumik nassuiaasiortoqaqqinnissaa akueriuminaatsillugu. Malittarisassat najoqqutassallu atuuttut aalajangiusimaneqarnissaannut atuutinneqarnissaannullu atorneqartariaqaraluarput, kiisalu suliniutit aallarnissaanerillu pioreersut isiginiarneqarlutik.

Ataatsimiititaliami ikinnerussutillit qulaani taaneqartut tamanna tunngavigalugu Naalakkersuisunit allannguutissatut siunnersuutip kiisalu siunnersuutip siulliup itigartitsissutigineqarnissaa inassutigaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassangortippaa.

---

Olga P. Berthelsen,  
Siulittaasoq

---

Debora Kleist

---

Isak Hammond

---

Justus Hansen

---

Knud Kristiansen

---

Ruth Heilmann

---

Malik Berthelsen